



INTRODUCZIUN

DA MARIA CRISTINA DERUNGS-BARTOLOMEI

Quei Evangeli envida en nus a suandar Jesus che va «vinavon» ed era «ordavon a tuts» (igl original grec ha omisduas muntadas) viers Jerusalem. Buca per entrar en el sco triumfader: El bragia mirond sil marcau, nua ch'el vegn a vegnir truaus alla mort. Mo, sco ils giuvnals che contan laud a Diu, savein nus renconuscher en Jesus il Messias migeivel e humiliteivels, che ademplescha las profezas e realisescha l'annunzia da Nadal «gloria en tschiel e pasch sin tiara», variada cheu en «Pasch en tschiel e gloria ell'altezia»: La pasch per Jesus ei buca sin quest mund, mobein ella levada. Il text porscha bia indezis per encuraschar a sefidar de Jesus. Sco el capitel 22 (cura ch'igl ei d'anflar ina sala per la tscheina pascala), tarmetta el ses discipels cun indicaziuns curiosas ed era ughiadas: «vus vegnis ad anflar in pulein...». Mo «sin siu plaid» van els ed anflan «sco il Segner veva detg». Quei di a nus che il maun de Diu sezuppa els schabetgs de nossa veta. Nus astgein sefidar: Negin era aunc sesius sin quei pulein. Quei vul dir: ei vegn encunter a nus enzatgei maisudiu, dil tut niev ella historia humana, enzatgi misterius ch'ei nies Retg, Signur, Salvader.

EVANGELI

Lc 19,28–40

²⁸Suenter quels plaids eis el ius vinavon viers Jerusalem. ²⁹S'avischinond a Betfage e Betania, damaneivel dil schinumnu Cuolm dallas ulivas, ha el tarmess ordavon dus da ses giuvnals e detg: ³⁰Mei el vitg davon vus. Entrond leu, anfleis vus in pulein ch'ei rentaus. Sin quel ei aunc negin sesius. Disrentei el e vegni cun el. ³¹E sch'enzatgi empiara vus: Pertgei disrenteis el? sche schei: Il Segner drova el. ³²Il tarmess ein i ed han anflau tut sco el veva detg ad els. ³³Cura ch'els disrentavan il pulein, han ses patrums dumandau: Pertgei disrenteis il pulein? ³⁴Els han rispundiu: Il Segner drova el. ³⁵Ed ei han menau il pulein tier Jesus, han tschentau sin el lur mantials e fatg seser Jesus sissu. ³⁶Entschevend el ad ir, han ei rasau lur vestgadira sin via avon el. ³⁷Arrivaus damaneivel dil liug, nua ch'ins descenda dil Cuolm dallas ulivas, ha l'entira roscha dils giuvnals entschiet plein legria a ludar Diu cun aulta vusch per tut las miracles ch'els vevan viu. ³⁸Els han clamau:
 Benedius il retg
 che vegn el num dil Segner!
 Pasch en tschiel e gloria ell'altezia!
³⁹Enzacons farisès ordenter la fuola han detg ad el: Mussader, scamonda quei a tes giuvnals! ⁴⁰Mo el ha rispundiu: Jeu ditgel a vus: Sch'els queschan, vegn la crappa a gir.